

AUGUSTUS JULIUS ANDRE LO SALI PA LAS VEGAS..

Awenochi lo bautisa su CD den Club Caiquetio..

Fotos y Texto : Poets.

DEN AMBIENTE

** Awenochi lo bay tuma lugar den Caiquetio Entertainment Center e gran bautismo di e CD "E Promesa Riba Bo Dia" di e gran cantante Boneriano,

Julius Andre.

For di diadomingo caba Julius Andre ta na Aruba y por a mira su presentacion durante e entrega di Premio Padu del Caribe, den cual e la



MARIACHI LIRIOS DEL CAMPO LO ACOMPAÑA JULIUS ANDRE..



** Mariachi Lirios del Campo lo acompaña Julius Andre awenochi durante estreno di su CD. Ya for di dialuna Mariachi Lirios del Campo ta full den ensayo hunto cu Julius Andre, pa asina presenta un show di

kita sombre. Mariachi Lirios del Campo a resulta ganadornan di mihor grupo di mariachi pa aña 1997 di Premio Padu del Caribe y awenochi nan lo celebra esaki engrande den Club Caiquetio hunto cu tur nan fanaticonan..

ricibi un tremendo aplauso pa su formidable actuacion.

Den un entrevista cu Julius Andre, el a declara cu tabata realmente un honor y placer di por a presenta como artista invita den un premiacion asina grandi y importante. Porfin despues di hopi tempo awenochi e lo bay duna su presentacion dilanti e publico Arubano, pa cual e tin un cariño special den su curason. Ademas tambe cu gran parti di su famia ta di Aruba kendenan ta famia Lopez di Sta. Cruz y San Nicolas.

Tambe cu e produccion di e CD, ta aki na Aruba el a realiza e grabacion hunto cu Mariachi Orguyo di Aruba y Mariachi Lirios del Campo, kendenan porcierto lo bay acompaña durante su presentacion.

Probechando di e oportunidad aki, DEN AMBIENTE a puntre con ta bay cu su preparacionnan pa Las Vegas, Julius a contesta cu tur cos ta bayendo bon y cu na luna di augustus e tin cu sali pa Miami, na unda e tin cu bay realiza grabacionnan pa su proximo produccion cual lo ta destina pa e mercado internacional. E grabacion aki lo bay tuma lugar den studio di Emilio Estefan, cual ta e prome fase, pa despues e



sigui pa Las Vegas na unda lo bay ta su base. Di Las Vegas, Julius lo tin cu bay den un gira di promocion bishitando ciudadnan manera; Los Angeles, New York, Missouri.

Prome cu Julius viaha pa Miami pa realiza su produccion internacional, e lo viaha pa Hulanda na unda e tin un gira pendiente, debi cu aya tambe su CD a dal masha

duro mes.

Ta un honor y placer pa Julius Andre realiza su acto di bautismo awenochi den un super show romantico hunto cu artistanan di taya manera; Trio Huasteca, Yolanda v/d Linde, Marcelino Paesch, Roland Angela, Cesar Olarte y tambe e dos mihor gruponan di mariachi esta Mariachi Perla di Aruba y Lirios del Campo..

Pa e gran anochi super romantico..

RENICK TOPPENBERG TAMBE LO FORMA PARTI DI TRIO HUASTECA..



** E fenomenal Trio Huasteca tambe lo duna nan presentacion den e show super romantico di awenochi den Club Caiquetio. Por a compronde for di Ety Toppenberg cu nan

lo bay presenta un repertorio romantico special pa e anochi super aki. Pa e anochi aki tambe lo forma parti di Trio Huasteca e joven guitarista di 15 aña, Renick Toppenberg,

kende a ser introduci durante e entrega di Premio Padu del Caribe y cu porcierto a haci un bunita impresion. Ta conoci cu na unda cu Trio Huasteca presenta, ta goza nan ta pone e publico goza bay off..